

# Pomilovanje za korupciju

Ivica Čobanac, bivši direktor Javnog poduzeća *Hercegbosanske šume d.o.o.*, Kupres (JP HBŠ), osuđen zbog zloupotrebe službenog položaja na 18 mjeseci zatvorske kazne neće otići u zatvor. To mu je omogućio predsjednik Federacije Bosne i Hercegovine (FBiH) Živko Budimir, koji mu je dao pomilovanje prije dva mjeseca. Predsjedničkim aktom milosrđa Čobancu je zatvorska kazna zamijenjena uvjetnom osudom s periodom kušnje od tri godine, što znači da u zatvor neće otići ukoliko u naredne tri godine ne počini novo krivično djelo.

Čobanac je jedna od [četiri osobe koje su odlukom predsjednika Budimira pomilovane u toku ove godine](#). Prema podacima iz Službenih novina FBiH pomilovani su i Dragan Vasiljević, osuđen zbog ubojstva na šest godina zatvorske kazne, Miran Voljevica, osuđen zbog razbojništva i teške krađe na četiri godine i 11 mjeseci zatvora te Merica Adamović, osuđena zbog obmane pri dobivanju kredita na godinu zatvora. Budimirovom odlukom o pomilovanju, Vasiljeviću je smanjena zatvorska kazna za šest mjeseci, Voljevici za četiri mjeseca, a Ademović je umjesto zatvorske kazne dobila uvjetnu osudu s rokom od dvije godine.

Prema navodima iz presude koju je u decembru 2012. godine izrekao Vrhovni sud FBiH, Čobanac je osuđen za koruptivno djelo. Njemu je presuda izrečena jer je kao direktor JP HBŠ d.o.o. Kupres protivno odlukama Upravnog odbora u toku 2000. odobrio otpis trećine duga koje je poduzeće *Finvest d.o.o.* Drvar imalo prema ovom javnom poduzeću. Dug je iznosio 2,4 miliona maraka. Također, s istim poduzećem Čobanac je sklopio i nepovoljan ugovor o kupoprodaji drvnih sortimenata u iznosu od 2,7 miliona maraka. Ugovor je sklopljen bez odobrenja Upravnog odbora.

Čobanac je u pritvoru proveo mjesec dana u 2004. godini. U trenutku izricanja pomilovanja nalazio se na slobodi.

Kantonalni sud u Livnu, koji je vodio prvostepeni postupak, dao je suglasnost na zahtjev o pomilovanju uz obrazloženje da je optuženik bio korektan prema sudu u toku kaznenog postupka, te da mu se obitelj nalazi u teškoj materijalnoj situaciji.

Ova pomilovanja izrečena u februaru i martu 2014. prva su pomilovanja koja je Budimir dao nakon što je prošle godine u aprilu uhićen zbog sumnje na zloupotrebu položaja prilikom davanja pomilovanja. Budimir je tada proveo mjesec dana u pritvoru dok je trajala istraga koju je vodilo državno tužilaštvo. Krajem prošle godine je podignuta optužnica, ali se Sud BiH proglasio nenadležnim za postupanje i predmet je proslijeđen kantonalnom tužilaštvo u Sarajevu.

Prema navodima iz tog tužilaštva ovaj krivični predmet je u završnoj fazi i uskoro bi se trebala donijeti i tužilačka odluka.